

Furriadura in sardu de su contu 'LA PENTOLA D'ORO E IL SOGNO DEL PADRE', chi ndi bessit de sa pàgina trintaduu (p. 32) de su liburu de MARCO PLACENTINO e intitulau "*Soleminis. Leggende e misteri. Contus de forredda*", Dolianova, Edizioni Grafica del Parteolla, 2017.

## **'SA PINGIADA DE ORU E SU BISU DE SU BABAI'**

Unu pòburu messaju fiat coiau e teniat duus fillus. Sa mulleri e finas is fillus fiant mortuus a lestru de pesti e fiat abarrau a solu e cun pagu dinai in busciaca po sodigai a bivi. Una noti iat bisau a su babai chi ddi iat nau chi ddi iat pòtziu agiudai a cambiai vida, a si torrai a ponni in bonu, a s'arricai, perou ddi depiat ponni a menti e sighiri, de conca a pei, su chi ddi at a èssiri nau de fai.

*«Bai a su campu chi t'apu lassau in sienda» - ddi iat nau - «lompi a sa mata de ilixi sa prus manna chi ddui agatas e sgava unu fossu bastanti mannu. Innantis de morri, difatis, apu tudau asuta de terra, ingunis etotu, una pingiada prena de oru. Dona atentzioni, perou, depis andai a sgavai a su noti, a scuriu mortu candu no nci est sa luna; pruschetotu, no depis nai a nisciunus de custu bisu e de custu scusòrgiu».*

Su mengianu infatu su messaju si-ndi fiat scidau, fiat lòmpiu a domu de su gopai e, no arrennescendi a mantenni cuau su secretu po sa cuntentesa e no incurendi-sì de su chi su babai ddi iat arrechomandau, ddi iat contau totu su bisu. Totu e duus si fiant acordaus po s'atobiai cussa noti etotu. Fiant andaus a su campu a pàlia e a picu e fiant lòmpius anca ddui fiat sa mata manna de ilixi. Iant cumentzau a sgavai depressi, no biendi-nci s'ora de s'arricai. Apustis de ddui èssiri fatu unu fossu bastanti mannu, asuta de sa mata iant agatau unu stuvioni. Abarrendi meda spantaus, perou, no ddui fiat arrastu perunu de sa pingiada, fiat abarrau sceti su sènniu in sa terra, comentis chi sa pingiada, totu in d-una, si-nci fessit sparèssia, lassendi-nci sceti unu stuvioni. Si fiant spantaus de prus candu iant agatau una farrancada de craboni a su postu de s'oru chi tanti disigiànt.